



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 422
fax. +387 33 726 414
e – mail: info@voda.ba

Broj: **UP-1/21-1-40-166-19/25**

Datum: **19.08.2025. godine**

„Agencija za vodno područje rijeke Save“ Sarajevo, rješavajući po zahtjevu Investitora „T.S.E.-Transporti speciali Europei“ d.o.o. Kladanj za izdavanje Rješenja o prethodnoj vodnoj saglasnosti za provođenja detaljnih geoloških istraživanja kamena krečnjaka na lokalitetu „Hrdar kosa“ Stupari, općina Kladanj, a u cilju proučavanja i definisanja kvantitativno-kvalitativnih karakteristika mineralne sirovine, na osnovu člana 139. stav (1) tačka 10. Zakona o vodama („Službene novine Federacije BiH“, br. 70/06 i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22) donosi

RJEŠENJE **o prethodnoj vodnoj saglasnosti**

1. Daje se prethodna vodna saglasnost Investitoru „T.S.E.-Transporti speciali Europei“ d.o.o. Kladanj za provođenja detaljnih geoloških istraživanja kamena krečnjaka na lokalitetu „Hrdar kosa“ Stupari, općina Kladanj, u cilju proučavanja istražnog prostora te definisanja kvantitativno-kvalitativnih karakteristika mineralne sirovine.
2. Ovaj vodni akt se ne odnosi na aktivnosti eksploatacije mineralne sirovine na predmetnom lokalitetu.
3. Ova prethodna vodna saglasnost daje se za aktivnost provođenja detaljnih geoloških istraživanja kamena krečnjaka na lokalitetu „Hrdar kosa“ Stupari, općina Kladanj, koja se ne smatraju građenjem, ali mogu trajno, povremeno ili privremeno uticati na promjenu režima voda i ista se može koristiti u postupku dobijanja urbanističke saglasnosti za istražne radove na predmetnom lokalitetu.
4. Prethodna vodna saglasnost izdaje se na određeno vrijeme, sa rokom važenja od tri godine od dana njene pravosnažnosti.
5. Prethodna vodna saglasnost se daje pod slijedećim uslovima:
 - 5.1. Realizaciju projektovanih aktivnosti na terenu vršiti prema projektnoj dokumentaciji: Studija za izdavanje prethodne vodne saglasnosti za potrebe vršenja detaljnih geoloških istraživanja kamena krečnjaka na lokalitetu „Hrdar kosa“ Stupari, općina Kladanj, urađena od strane JP „Spreča“ d.d. Tuzla, mart 2025. godine.
 - 5.2. Izvođač radova je u obavezi da projektovana istraživanja vrši prema važećim tehničkim propisima, normativima, uzusima i standardima za tu vrstu radova, uz primjenu odgovarajućih mjera, a sve sa ciljem zaštite površinskih i podzemnih voda u cjelini kako u kvantitativnom tako i u kvalitativnom smislu.
 - 5.3. Prije započinjanja radova nosilac prava iz ovog rješenja dužan je riješiti imovinske i pravne odnose sa vlasnikom zemljišta na lokalitetu na kome će se vršiti istraživanja kao i za pristup istom, kao i lokaliteta za smještaj građevinske mehanizacije i ostale opreme, odnosno obezbijediti saglasnost organa nadležnog za održavanje saobraćajnica za dionice koje će se koristiti prilikom izvođenja ovih aktivnosti.
 - 5.4. Planom organizacije gradilišta koje će se formirati u funkciji provođenja navedenih aktivnosti, treba osigurati da mjesta za smještaj građevinske mehanizacije, tečnih goriva i maziva, budu locirana izvan obuhvata zona uticaja na kvalitet podzemnih voda i na takvoj udaljenosti da ne mogu imati negativan uticaj na izvorišta.
 - 5.5. Sve kolizije sa postojećim infrastrukturnim objektima (instalacijama vodovoda i kanalizacije, elektro i sl.), na lokalitetu na kojem će se vršiti istražni radovi i ispitivanja, ukoliko do takvih situacija tokom izvođenja radova dođe, prethodno će se rješavati uz saglasnost mjesno nadležnog operatera koji upravlja tim objektima i instalacijama i isti će dati tehničke uslove za izvođenje ovih radova.
 - 5.6. Potrebno je sagledati sve moguće neželjene uticaje planiranih aktivnosti na izgrađene objekte i postrojenja, stečena prava korisnika, naselja i sl., te dati prijedlog mjera za uklanjanje odnosno sprečavanje tih uticaja;

- 5.7. Ukoliko se na prostoru predmetnog istražnog polja planiraju postaviti spremnici s gorivom, za iste je potrebno uraditi vodonepropusne posude istog ili većeg kapaciteta ili postaviti spremnike s dvostrukom stjenkom prema posebnim propisima.
- 5.8. Na prostoru istražnog polja nije dozvoljeno servisiranje mehanizacije i vozila.
- 5.9. Na istražnom polju je potrebno osigurati priručna sredstva za brzu intervenciju u slučaju izlivanja motornog ulja ili ulja iz hidraulike strojeva (materijali za upijanje i sl.).
- 5.10. U slučaju opasnosti od zagađenja vode nastalim djelovanjem ili propustom izvođača radova potrebno je preduzeti sve neophodne mjere za sprječavanje ili ublažavanje uticaja prouzrokovanih incidentom, te spriječiti ponovni nastanak incidenta, a zatim, bez odlaganja, o tome obavijestiti nadležne organe.
- 5.11. Investitor je u obavezi da angažuje stručno lice sa osnovnim zadatkom kontinuiranog nadzora (praćenja i kontrole) nad provođenjem projektovanih aktivnosti na terenu i poštivanja uslova iz ovog rješenja.
- 5.12. Nakon realizacije projektovanih aktivnosti na terenu investitor je u obavezi da izvrši rekultivaciju zemljišta, tj. dovede istražne prostore u prvobitno stanje.
6. Nakon izrade dokumentacije o rezultatima provedenih geoloških istražnih radova i ispitivanja mineralne sirovine krečnjaka na lokalitetu „Hrdar Kosa“ Stupari, Općina Kladanj a u cilju proučavanja istražnog prostora te definisanja kvantitativno-kvalitativnih karakteristika mineralne sirovine, a prije početka eksploatacije mineralne sirovine na predmetnom lokalitetu, investitor će zatražiti izdavanje prethodne vodne saglasnosti za ispuštanje tehnoloških otpadnih voda i aktivnosti koje mogu imati specifične uticaje na vode sa lokacije ležišta mineralne sirovine.
7. Zahtjev za izdavanje prethodne vodne saglasnosti dostavlja se u skladu sa članom 3. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19, 41/20 i 63/22).
8. Investitor je dužan da prilikom realizacije projektovanih aktivnosti na terenu predvidi odgovarajuće mjere da predmetnom aktivnošću, za koju se utvrđuju uvjeti, ne bi došlo do šteta za okoliš ili nepovoljnih posljedica za vodoprivredne interese, a u protivnom je dužan iste nadoknaditi.
9. Ovo rješenje o prethodnoj vodnoj saglasnosti može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Investitor „T.S.E.-Transporti speciali Europei“ d.o.o. Kladanj podnio je zahtjev za izdavanje Rješenja o prethodnoj vodnoj saglasnosti za realizaciju projekta detaljnih geoloških istraživanja mineralne sirovine krečnjaka na lokalitetu „Hrdar Kosa“ Stupari, Općina Kladanj, u cilju proučavanja istražnog prostora te definisanja kvantitativno-kvalitativnih karakteristika mineralne sirovine.

Uz zahtjev je dostavljena sljedeća dokumentacija:

A. Opšta dokumentacija:

- Rješenje o izmjenama podataka, broj: 032-0-Reg-21-002127 od 07.01.2022. godine izdato od strane Općinskog suda u Tuzli – ovjerena kopija,
- Zapisnik o utvrđivanju uslova za bavljenje registrovanim djelatnostima u rudarstvu, broj:16-18-4-00444/2015 od 06.02.2015. godine sačinjen od strane Federalne uprave za inspekcijske poslove- Inspektorat tehničke inspekcije – kopija,
- Uvjerenje o poreznoj registraciji od 16.05.2008. godine izdat od strane Kantonalnog poreznog ureda u Tuzli – ovjerena kopija,
- Izvod iz katastarsko-knjižnog uloška broj 55, broj:05/00-26-297/25-2 od 20.03.2025. godine izdat od strane Službe za geodetske, imovinsko-pravne poslove i prostorno uređenje općine Kladanj – ovjerena kopija,
- Kopija katastarskog plana, Ur. broj:05/_-26-297/2025-3 od 20.03.2025. godine izdata od strane Službe za geodetske, imovinsko-pravne poslove i prostorno uređenje općine Kladanj – ovjerena kopija,
- Mišljenje, broj:05/2-19-4-257/24 od 18.12.2024. godine izdato od strane Službe za geodetske, imovinsko-pravne poslove i prostorno uređenje općine Kladanj,
- Obavijest izdata od strane Službe za budžet, finansije i poduzetništvo općine Kladanj, broj:03/1-21-1557/25 od 04.07.2025. godine – kopija,
- Obavijest, broj:03/1-14-17959/25 od 26.06.2025. godine izdata od strane Ministarstva privrede Tuzlanskog kantona,

- Očitovanje, broj 96/25 od 05.06.2025. godine dostavljeno od strane „T.S.E.-Transporti speciali Europei“ d.o.o. Kladanj,
- Odgovor, broj:05/1-19-1360/25 od 09.06.2025. godine dostavljen od strane Službe za geodetske, imovinsko pravne poslove i prostorno uređenje općine Kladanj,
- Očitovanje, broj:06-14-2-1143/25 od 28.07.2025. godine izdato od strane Federalnog ministarstva energije, rudarstva i industrije,
- Dokaz o uplaćenju federalnoj upravnoj pristojbi na zahtjev.

B. Tehnička dokumentacija:

- Studija za izdavanje prethodne vodne saglasnosti za potrebe vršenja detaljnih geoloških istraživanja kamena krečnjaka na lokalitetu „Hrdar kosa“ Stupari, općina Kladanj urađena od strane JP „Spreča“ d.d. Tuzla, mart 2025. godine, broj projekta: 051-01-1-405/25.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

Zahtjev je u skladu sa odredbama člana 1. Pravilnika o sadržaju, obliku, uslovima i načinu izdavanja i čuvanja vodnih akata (Sl. novine FBiH», broj:31/15, 55/19, 41/20, 63/22), bio oglašen dana 22.05.2025. godine, na oglasnoj ploči Agencije i u dnevnom listu „Oslobođenje“.

- U postupku oglašavanja na protokolu Agencije dana 28.05.2025. godine zaprimljene su dvije anonimne primjedbe na planirane istražne radnje i ispitivanja na lokalitetu Hrdar Kosa-Hrastić-Stupari-Kladanj. U anonimnim prijavama su iznešene primjedbe na planiranu realizaciju projekta detaljnih geoloških istraživanja mineralne sirovine krečnjaka na lokalitetu „Hrdar Kosa“ Stupari, Općina Kladanj, a koje se, između ostalog, fokusiraju na ugrožavanje:

- fizičke sigurnosti domaćinstava usljed miniranja, a što za posljedicu ima oštećenja na stambenim objektima,
- zdravlja i svakodnevnog života mještana zbog intenzivne buke, prašine, vibracija koje bi poremetile normalan život i uticale na psihofizičko stanje mještana,
- kvalitet i očuvanje okoliša, uključujući zagađenje zraka, zemljišta i ugrožavanje lokalne flore i faune,
- vodoopskrbe i javnog zdravlja jer je ranijim istraživanjima već dokazano da eksploatacija kamena na ovom lokalitetu ima direktan negativan uticaj na izvorište pitke vode sela Rujici koje se nalazi u neposrednoj blizini.

Pored navedenog mještani upozoravaju da se na ovom lokalitetu nalazio kamenolom „Damm“ koji je zatvoren upravo zbog navedenih problema, te da bi pokretanje eksploatacije ugrozilo izvor pitke vode lokalnog stanovništva, životnu sredinu lokalnog stanovništva, a što je potvrđeno prethodnim istraživanjima i nalazima.

- Nakon prijema anonimnih primjedbi Agencija se aktom broj: UP-1/21-1-40-166-8/25 od 29.05.2025. godine obratila pravnom licu „T.S.E.-Transporti speciali Europei“ d.o.o. Kladanj sa zahtjevom za pismeno očitovanje po primjedbama podnesenim od strane lokalnog stanovništva.

- Agencija se aktom broj: UP-1/21-1-40-166-9/25 od 29.05.2025. godine obratila Općini Kladanj, Službi za geodetske, imovinsko-pravne poslove i prostorno uređenje sa zahtjevom za pismeno očitovanje na dostavljene anonimne prijave. U zahtjevu Agencije navedeno je i da je pravno lice uz zahtjev za izdavanje rješenja dostavilo i akt - Mišljenje broj: 05/2-19-4-257/24 od 18.12.2024. godine izdato od strane Službe za geodetske, imovinsko-pravne poslove i prostorno uređenje općine Kladanj, u kojem se ne pominje vodozavat koji je u sistemu vodosnabdijevanja lokalnog stanovništva (sela Rujici i okolnih naselja), rezultate provedenih istražnih radova i ispitivanja kojima je potvrđeno da se eksploatacijom krečnjaka narušava hidrološka stabilnost i kvalitet vode, te da je iz tog razloga i obustavljen rad kamenoloma „Dam“.

Zatraženo je da Agenciju obavijeste o slijedećem:

- da li se sa izvorišta pitke vode sela Rujici zahvata voda za potrebe vodosnabdijevanja lokalnog stanovništva,
- da li je izvorište u obuhvatu istražnog polja na koje je izdato predmetno Mišljenje, koja količina vode se zahvata, kojeg kvaliteta i pod čijom je ingerencijom, da li postoji Odluka o zaštiti predmetnog izvorišta,
- rezultate dobivene nakon provedenih istražnih radova i ispitivanja koji su prethodili Odluci o zaustavljanju eksploatacije mineralne sirovine tj. rad kamenoloma „Dam“.

Agencija je zatražila dostavljanje i drugih informacija, tj. relevantnih podataka, a koji će biti uvaženi u toku vođenja ovog upravnog postupka.

- Agencija se obratila i Ministarstvu privrede Tuzlanskog kantona, aktom broj: UP-1/21-1-40-166-10/25 od 30.05.2025. godine sa zahtjevom za dostavljanje relevantnih podataka a po anonimnim prijavama lokalnog stanovništva. Uz zahtjev priložene su i anonimne prijave lokalnog stanovništva.
- Dana 16.06.2025. godine na protokolu Agencije zaprimljen je akt broj:05/1-19-1360/25 od 09.06.2025. godine izdat od strane Službe za geodetske, imovinsko-pravne poslove i prostorno uređenje općine Kladanj. U dostavljenom Odgovoru, između ostalog stoji da je za izradu Mišljenja izvor podataka Prostorni plan Općine Kladanj za period od 2014. do 2034. godine i Odluka o provođenju Prostornog plana Općine Kladanj („Službeni glasnik općine Kladanj” broj 2/18). Dalje, u odgovoru stoji da uvidom u prilog-karta broj XVIII Projekcija prostornog razvoja – sintezni prikaz korištenja prostora općine Kladanj, utvrđeno je da predmetni lokalitet obuhvata dio zemljišta označenog kao parcela k.p. broj 1553/1 K.O. Prijanovići, općina Kladanj, te da je evidentirano da preko površine označene kao kamenolom-stanje, prolazi trasa vodovoda za naseljeno mjesto Prijanovići, te da osim navedene trase, druge trase vodovoda na karti Projekcija prostora razvoja okoline-Sintezni prikaz korištenja prostora općina Kladanj nisu evidentirane na predmetnom lokalitetu. Na prilogu IX.1. Projekcija prostornog razvoja okoline, Izvorišta i zaštitne zone, općina Kladanj, također nije evidentirano izvorište na predmetnom lokalitetu. Pored navedenog nadležna služba općine Kladanj uputila je Agenciju na Službu za budžet, finansije i poduzetništvo općine Kladanj, a u cilju kompletiranja prethodno traženih podataka.
- Agencija se aktom broj:UP-1/21-1-40-166-14/25 od 25.06.2025. godine obratila Službi za budžet, finansije i poduzetništvo općine Kladnja, a u cilju kompletiranja prethodno traženih podataka. Uz zahtjev dostavljene su i anonimne prijave lokalnog stanovništva.
- Od strane Ministarstva privrede Tuzlanskog kantona dana 01.07.2025. godine zaprimljen je akt broj:03/1-14-17959/25 od 26.06.2025. godine tj. Obavijest u kojoj stoji da se pravno lice „T.S.E.-Transporti speciali Europei” d.o.o. Kladanj u prethodnom periodu obraćalo sa zahtjevom za odobrenje za izvođenje detaljnih geoloških istraživanja na istražnom prostoru „Hrdar Kosa”-Stupari. Obzirom da zahtjev nije bio potpun isti je okončan Zaključkom o obustavljanju postupka izdavanja odobrenja za provođenje detaljnih istražnih radova i ispitivanja. Pored navedenog, u aktu je navedeno i da ministarstvo nije upoznato sa Y i X koordinatama prelomnih tačaka istražnog prostora (koje im je Agencija dostavila uz zahtjev za mišljenje), te da pretpostavljaju da se radi o novom istražnom prostoru. Nadalje, ministarstvu je poznata činjenica da je na pomenutom lokalitetu u 2007. godini postojao kamenolom „Damm” te da je isti zatvoren, da ministarstvo nije izdalo dozvole niti za istraživanja niti za eksploataciju, a samim time niti za obustavu eksploatacije, obzirom da su kantonalni Zakon o geološkim istraživanjima kao i Zakon o rudarstvu u Tuzlanskom kantonu stupili na snagu u 2011. godini. U aktu su uputili Agenciju da informacije o pomenutom kamenolomu „Damm” zatražimo od Federalnog ministarstva energije, rudarstva i industrije.
- Agencija se aktom broj: UP-1/21-1-40-166-16/25 od 07.07.2025. godine obratila Federalnom ministarstvu energije, rudarstva i industrije sa zahtjevom za dostavljanje relevantnih podataka, obzirom na Zakone koji su bili na snazi u toku 2007. godine. Uz zahtjev dostavljene su i anonimne prijave lokalnog stanovništva.
- Služba za budžet, finansije i poduzetništvo općine Kladanj je dostavila Obavijest, broj:03/1-21-1557/25 od 04.07.2025. godine a koja je zaprimljena na protokolu Agencije 09.07.2025. godine u kojoj stoji da:
 - Nema službene evidencije o izvorištu zahvata vode za potrebe vodosnabdijevanja lokalnog stanovništva (sela Rujici i okolnih naselja) sa tog lokaliteta, a da li postoje u vlastitoj režiji bez dokumentacije nije poznato. Općina Kladanj nije izdavala dokumentaciju iz svoje nadležnosti potrebnu za legalizaciju izvorišta i izgradnju vodovoda, a koja bi mogla potvrditi postojanje izvorišta na tom lokalitetu.
 - Nije donešena i ne postoji zahtjev za donošenje Odluke o zaštiti predmetnog izvorišta i zaštitnim mjerama za izvorište sa tog lokaliteta od strane Općine Kladanj.
 - Općina Kladanj nije provodila nikakve istražne radove i ispitivanja koji su prethodili Odluci o zaustavljanju eksploatacije mineralne sirovine tj. rad kamenoloma „Damm”.
- Od strane Federalnog ministarstva energije, rudarstva i industrije na protokolu Agencije zaprimljen je akt broj:06-14-2-1143/25 od 28.07.2025. godine. U aktu stoji da je uvidom u katastar odobrenih istražnih prostora i katastar odobrenih eksploatacionih polja koji se vodi u Ministarstvu, privrednom društvu „Damm” d.o.o. Tuzla, pravnom sljedbeniku privrednog društva „Jusup” d.j.l. Kladanj izdata slijedeća dokumentacija:

- Rješenje kojim se odobrava privrednom društvu „Jusup“ d.j.l. Kladanj izvođenje geoloških istraživanja mineralne sirovine-krečnjaka na lokalitetu Hrdar Kosa kod Stupara, općina Kladanj, broj 09-18-359/99 od 06.05.1999. godine.
- Odobrenje kojim se odobrava prenos istražnog prostora i odobrenja za istraživanje mineralne sirovine krečnjaka sa preduzeća „Jusup“ d.j.l. Kladanj na preduzeće „Damm“ d.o.o. Tuzla, broj 09-18-359/99 od 07.12.1999. godine.
- Zaključak o ispravci greške u prethodno izdatom rješenju, broj 09-18-359/99 od 08.12.1999. godine.
- Rješenje kojim se privrednom društvu „Damm“ d.o.o. Tuzla u periodu od dvije godine odobrava eksploatacija industrijske mineralne sirovine krečnjaka na eksploatacionom polju „Hrdar Kosa“ kod Stupara na području općine Kladanj, broj 07-18-668/02 od 08.07.2003. godine.

U provedenom postupku konstatovali smo sljedeće:

- Istražni prostor je dio: k.č. 1553/1 (katastarska općina Prijanovići, naziva parcele Lijehe), ukupne površina cca 4,2 hektara.

Koordinate prelomnih tačaka istražnog prostora su prikazane u tabeli:

tačka	Y	X	tačka	Y	X
1	6 556 044.99	4 906 207.99	11	6 556 251.05	4 906 365.94
2	6 556 215.00	4 906 150.00	12	6 556 246.88	4 906 382.85
3	6 556 228.69	4 906 277.79	13	6 556 230.61	4 906 394.89
4	6 556 229.13	4 906 290.33	14	6 556 202.03	4 906 391.96
5	6 556 238.78	4 906 295.80	15	6 556 164.57	4 906 411.68
6	6 556 268.15	4 906 275.16	16	6 556 146.31	4 906 406.53
7	6 556 299.50	4 906 279.13	17	6 556 108.21	4 906 414.86
8	6 556 300.45	4 906 290.55	18	6 556 085.19	4 906 407.32
9	6 556 273.75	4 906 317.02	19	6 556 083.11	4 906 389.02
10	6 556 255.21	4 906 349.03	20	6 556 048.05	4 906 344.71
			21	6 556 067.42	4 906 335.34

- Rudarsko-geološko-građevinski fakultet Univerziteta u Tuzli, uradio je projekat detaljnih geoloških istraživanja (Projekat detaljnih geoloških istraživanja krečnjaka na lokalitetu „Hrdar Kosa“, Stupari – općina Kladanj).

Projektom je definisan obim i vrsta istražnih radova kojima će se, nakon njihove realizacije, dobiti jasna slika o geološkoj građi, sastavu, sklopu i strukturi ležišta, te podaci o kvaliteti i rezervama krečnjaka. Obim i struktura projektovanih istražnih radova usklađeni su prema kriteriju ležišta, u skladu sa standardnom nomenklaturom za izradu Projekata istražnih radova, u skladu sa Pravilnikom o sadržini programa, projekata i elaborata geoloških istraživanja, te Zakonu o geološkim istraživanjima.

- Na području općine Kladanj nalaze se zone sanitarne zaštite za izvorišta Tarevčica, Zatoča i Sedam vrela koja se koriste za snabdijevanje vodom grada Tuzle, Živinice i MZ Stupari (općina Kladanj). Na sjednici Općinskog vijeća Kladanj donijeta je Odluka o zonama sanitarne zaštite i zaštitnim mjerama za navedena izvorišta broj 01-33-1952/22 od 10.08.2022. godine.

Istražno polje kamena krečnjaka na lokalitetu "Hrdar kosa" Stupari ne spada niti u jednu zaštitnu zonu izvorišta Tarevčica, Zatoča i Sedam vrela.

Svi rezultati i prikupljeni podaci terenskih istraživanja te prikupljena ostala dokumentacija, obradit će se kabinetski, savremenim metodama obrade i sadržajem u skladu sa Zakonom o geološkim istraživanjima Federacije BiH (Sl. novine FBiH br. 09/10, 14/10), Pravilnikom o sadržini projekata i elaborata geoloških istraživanja (Sl.list R BiH br. 16/93), Pravilnikom o klasifikaciji, kategorizaciji, proračunu rezervi podzemnih voda i vođenju evidencije o njima ("Sl. novine FBiH br. 85/17).

Na osnovu prednjeg i provedenog postupka, a shodno članu 111. Zakona o vodama, članovima 5. i 17. stav 1. tačka 16. Pravilnika o sadržaju, obliku, uslovima, načinu izdavanja i čuvanja vodnih akata, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, tačkom 5. dispozitiva rješenja, shodno odredbama Zakona o vodama, Pravilnika o sadržaju, obliku, uslovima i načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije propisani uslovi koje je Investitor dužan ispuniti prilikom izvođenja istraživanja kamena krečnjaka na lokalitetu „Hrdar Kosa“, Općina Kladanj.

Podnosilac zahtjeva je izvršio uplatu posebnih troškova koji su nastali u postupku donošenja rješenja o prethodnoj vodnoj saglasnosti, u skladu sa Zaključkom o visini i roku za plaćanje posebnih troškova, broj:UP-1/21-1-40-166-11/25 od 05.06.2025. godine.

Podnosilac zahtjeva je uplatio upravnu taksu u iznosu od 80,0 KM u skladu sa članom 7. stav 1. tarifni broj 43. Zakona o federalnim upravnim taksama („Službene novine F BiH“, broj 6/98 i 43/13).

Uputa o pravnom lijeku:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife federalnih administrativnih taksi.

Voditelj postupka:

mr Selma Merdan, dipl.inž.geol.

Po ovlaštenju
Rukovodilac Sektora za izdavanje vodnih akata



Nihad Pezo
Nihad Pezo, dipl.inž.građ.

Dostaviti:

- „T.S.E.-Transporti speciali Europei“ d.o.o.
Stupari Centar bb, 75283 Kladanj,
- ⊖ AVP Sava, ISV-vodna knjiga,
- Sektor 40 – arhiva,
- Oglasna ploča - AVP Sava